

皇清經解

皇

清

經

解

皇清經解卷一千二百五十七

學海堂

爾雅義疏

棲霞郝戶部

懿行

著

釋詁弟一

釋者說文云解也从采取其分別物也詁者說文云訓故言也从古聲古故也从十口識前言者也

釋文引張揖雜字云詁者古今之異語也然則詁之為言故也故之為言古也詁通作故亦通作古釋文詁兼古故二音是也又引樊光李巡本釋詁作釋故詩周南釋文亦云樊孫等爾雅本皆為釋故說文言部引詩曰詁訓漢書藝文志作故訓詩蒸民云古訓是式蓋古訓即故訓故訓亦即詁訓竝字異而義通矣此篇自始也以下終也以上皆舉古言釋以今語其間文字重複展轉相通蓋有諸家

郭璞注

初哉首基肇祖元胎俶落權輿始也

尚書曰三月哉生魄詩曰令終有俶又曰俶載南畝

又曰訪予落止又曰胡不承權輿胎胎未成亦物之始也其餘皆義之常行者耳此所以釋古今之異言通方俗之殊語

此釋始之義也說文云始女之初也釋名云始息也言滋息也按始與治通書云在治忽史記夏紀作來始滑漢書律厯志作七始詠是始治通也初者裁衣之始哉者草木之始基者築牆之始肇者開戶之始祖者人之始胎者生之始也每

字皆有本義但俱訓始例得兼通不必與本義相關也初既
訓始觀禮及檀弓注又訓故者故亦古也古亦始也始與治
通故下文又云治故也哉者才之假音說文云才艸木之初
也經典通作哉尙書大傳云儀伯之樂舞藝哉詩云陳錫哉
周鄭俱以哉爲始也郭注下文茂勉引大傳茂哉茂哉釋文
或作茂才書云往哉汝諸張平子碑作往才汝諸哉生魄晉
書夏侯湛傳作才生魄是才哉古字通又通作載陳錫哉周
左氏宣十五年傳作陳錫載周書載采采史記夏紀作始事
事詩載見辟王傳亦云載始也是載哉通爾雅釋文哉亦作
栽中庸栽者培之鄭注栽讀如文王初載之載栽或爲茲茲
栽哉古皆音同字通也首者與鼻同意方言云鼻始也畧之
初生謂之鼻人之初生謂之首是首鼻其義同特言此者人
生之始首鼻居先也胎者一切經音義一引爾雅舊注云胎
始養也漢書枚乘傳云福生有基禍生有胎服虔注基胎皆
始也通作殆詩殆及公子同歸傳始始也釋文殆作迨始也
爾雅釋文胎孫炎大才反本或作台是台迨殆俱胎之假音
矣俶者說文云始也又土部坂一曰始也則其義同釋名云
荆豫人謂長婦曰孰孰祝也祝始也是孰與俶音義又同也
落者詩訪予落止逸周書文酌篇云物無不落毛傳及孔晁
注並云落始也權輿者廣雅疏證以爲其萌蘗之假音則
與才落義皆相近詩不承權輿文酌篇云一榦勝權輿周月
篇云日月權輿大戴禮誥志篇云百草權輿皆以權輿連文

古書多假借今略爲標舉如基肇祖三字俱訓爲始詩夙夜
基命禮孔子閒居基命作其命書丕丕基漢石經作不其
儀禮士喪禮注古文基作期是期其通基也肇乃羣之假音
說文羣始開也詩后稷肇祀禮表記作兆祀是兆肇通羣也
祖古金石文字作且書黎民阻飢史記集解據今文尙書作
祖飢索隱據古文作阻飢詩六月徂暑箋徂猶始也是徂阻
通祖矣凡聲同
之字古多通用

林丞天帝皇王后辟公侯君也

詩曰有王有林又曰文王
丞哉其餘義皆通見詩書

說文云君尊也儀禮喪服傳云君至尊也鄭注天子諸侯及
卿大夫有地者皆曰君逸周書諡法篇云賞慶刑威曰君從
之成羣曰君白虎通云君羣也羣下之所歸心也然則君之
言羣凡羣衆所歸皆謂之君矣林丞者衆也又訓君者衆之
所歸斯謂之君與君羣義同也林者詩有王有林毛傳用爾
雅楚辭天問篇云伯林雉經王逸注及漢書律厯志並云林
君也丞者釋文云本又作蒸蒸丞古字通詩文王丞哉毛傳
丞君也釋文引韓詩云丞美也美與君義亦近凡臣子於君
父以美大之詞言之故皇謂之大亦謂之美亦謂之君丞謂
之衆亦謂之美亦謂之君凡有數義而皆通斯爾雅諸文之
例也不明乎此則窒矣林亦盛大之詞與丞同意故平都相
蔣君碑云於穆林丞以二字連文其義與單文同也天與帝

亦訓爲君者天帝俱尊大之極稱故臣以目君焉易說卦云乾爲天爲君左氏宣四年傳云君天也鶚冠子道端篇云君者天也是皆以君爲天之證古者稱君或言昊天或言天王或言天子其名異其實同也說文云帝諦也王天下之號也風俗通引書大傳云帝者任德設刑以則象之言其能行天道舉錯審諦謚法篇云德象天地曰帝是帝本天之號又爲王者之稱故詩上帝板板上帝甚蹈毛傳皆以上帝爲王矣皇者說文云大也外自自始也始皇者三皇大君也謚法篇云靜民則法曰皇詩有皇上帝毛傳皇君也凡詩之皇尸皇祖士昏禮之皇舅士虞禮記之皇祖鄭皆以皇爲君也王者說文云天下所歸往也風俗通引書大傳同謚法篇云仁義所在曰王仁義所在是卽民所歸往也王與皇同意故春秋繁露云王者皇也書建用皇極洪範五行傳作建用王極皇王其義同也后者說文云繼體君也周禮量人營后宮禮記內則后王命冢宰鄭注竝云后君也釋文引孫炎云后王君王也辟者下文云法也此訓君者君爲人所法也人所法爲君猶人所歸往爲王矣詩內辟字毛鄭多訓爲君書馬鄭注義亦同也公侯者列國之君也故釋名云公君也君尊稱也周禮牛人掌公牛巾車掌公車鄭注竝云公猶官也史記孝文紀索隱曰官猶公也然則公亦爲官官亦爲公反覆相訓義得兼通公官又一聲之轉故廣雅云官君也是官亦稱君矣侯者詩云洵直且侯侯文王孫子謹爾侯度毛鄭竝云侯

君也羔裘釋文引韓詩云侯美也又訓美者與烝同義故烝
侯毛傳並云君韓詩並云美臣子於君父以美大之詞言之
亦其證也公侯皆有本義白虎通言公者公正無私侯者侯
順逆皆其義又訓君者公侯雖臣於其國稱君也然則伯子
男亦列國之君此不言者舉尊以例
卑及卿大夫之有地者亦得兼包焉

弘廓宏溥介純夏懽厖墳嘏丕奕洪誕戎駿假京碩濯訐宇穹

壬路淫甫景廢壯冢簡葑畎畹將業蓆大也

詩曰我受命溥將又曰亂如此懽爲

下國駿厖湯孫奏假王公伊濯訐謨定命有王有林厥聲載路
既有淫威廢爲殘賊爾土宇畎章緇衣之蓆兮廓落宇宙穹隆
至極亦爲大也劉義未聞尸子
曰此皆大有十餘名而同一實

釋君之後繼以大者君亦大也故老子云天大地大王亦大
說文本之而云天大地大人亦大尸子本此而云天帝后皇
辟公皆大也是皆君亦訓大之義推此而言林烝亦有大意
公侯亦兼大名其義舉可見矣廓者方言云張小使大謂之
廓一切經音義九引孫炎云廓張之大也詩云憎其式廓文
選西京賦云廓開九市毛傳及薛綜注並云廓大也孟子云
知皆擴而充之趙岐注擴廓也釋名云郭廓也廓落在城外
也公羊文十五年傳云恢郭也恢郭卽恢廓故意林引風俗

通云郭大也詩皇矣釋文郭本又作廓蓋正義本作廓釋文本作郭而音亦苦霍反是郭廓通擴義亦同矣宏者說文云屋深響也書用宏茲責正義引樊光曰周禮云其聲大而宏禮記月令其器閎以奄呂覽孟冬紀作其器宏以弇史記司馬相如傳云必將崇論閎議漢書閎作弘一切經音義十七云宏古文宏同是宏閎俱與宏通逸周書皇門篇之閎孔晁音皇詩執競篇之嗶徐邈又音宏宏皇聲轉皇亦大也是音義又通矣溥者經典與普通通詩溥天之下左氏昭七年傳及孟子竝作普天之下儀禮鄭注普大也是普溥通又通鋪與敷詩鋪敦淮漬釋文引韓詩鋪作敷云大也禮記祭義云溥之而橫乎四海釋文溥本亦作敷蓋溥鋪敷俱从甫聲凡聲同者字亦通也溥旁聲轉說文云旁溥也聲轉爲旁薄又爲旁魄又爲彭魄又爲旁勃又爲盤礴竝以聲爲義矣介者奈之假借也說文方言竝云奔大也經典通作介逸周書武順篇云集固介德離騷云彼堯舜之耿介孔晁王逸注竝云介大也純者奄之假借也說文云奄大也讀若鵠經典通作純周語云俾莫不任肅純恪文選魯靈光殿賦云承蒼昊之純殷章昭及張載注竝云純大也又方言云純好也呂覽士容篇注純美也漢書注純善也純又訓善者與介同意故介訓善又訓大純訓大又訓善也好美皆善矣純通作淳鄭語云黎爲高辛氏火正以淳耀敦大韋昭注淳大也是淳純通矣夏者方言云大也樂記同說文以夏爲中國之人蓋有威儀

備具之美周禮染人秋染夏及夏采說者以夏爲五色之名爾雅兼包二義故訓爲大左傳云能夏則大書云羽畎夏翟可知二義兼矣幬者說文云覆也覆冒義亦爲大故方言云幬大也詩亂如此幬毛傳同通作臚儀禮公食大夫禮及周禮腊人鄭注並云臚大也臚義與庶同韋昭晉語注云庶豐也豐亦大也說文云無豐也引商書曰庶草繁無今書無作庶是聲義又同矣幬荒聲轉詩天作傳荒大也凡聲同聲近聲轉之字其義多存乎聲皆此例也厖者說文云石大也方言云濇之大也厖濇聲近故方言又云秦晉之間凡大貌謂之濇或謂之厖矣墳者釋丘云墳大防方言云墳地大也青幽之間凡土而高且大者謂之墳詩牝羊墳首周禮司烜共墳燭通作賁詩賁鼓維鏞書用宏茲賁賁皆大也又通作頌說文云頌大頭也引詩有頌其首正義據釋詁云頌與墳字雖異音義同此說是也但古書多假借頌首之頌則頌爲正體墳乃假借書正義據樊光引詩作有賁其首賁亦假借矣故方言云墳大也通作格少年饋食禮云以賁于主人鄭注古文賁爲格士冠禮云孝友時格鄭注今文格爲賁又通作假詩駸假無言左氏昭廿年傳作駸賁無言士冠禮及禮運釋文並云賁本或作假蓋賁爲本字假爲通借假格古音相轉故其字俱通矣假古讀若鼓夏古讀若戶故鄉飲酒義云夏之爲言假也皆以聲近爲義也不者書云三苗不敘史記

夏紀作三苗大序漢書郊祀志引大誓曰丕天之太律鄭注
不大也張參五經文字云丕石經作平見春秋傳按左傳平
鄭父是也爾雅本亦有作平者故釋文云丕字又作平通作
不戴氏震毛鄭詩考正云書立政篇丕丕基漢石經作不
其凡詩中不顯不承不時不寧不康皆當讀爲丕詩之不顯
不承卽書之丕顯丕承也奕奕盛貌盛大義亦近也通作亦詩
懷詩注引韓詩章句云奕奕盛貌盛大義亦近也通作亦詩
亦服爾耕亦有高廩鄭箋並云亦大也不顯亦世後漢書袁
術傳注及魏書禮志作不顯奕世是其字通矣洪者水之大
也故說文云洪洚水也洚與洪音義同通作鴻書之洪水史
記俱作鴻水文選四子講德論云夫鴻均之世李善注鴻與
洪古字通也誕者詞之大也詩書誕皆訓大何誕之節兮毛
傳誕闕也闕亦大矣戎者詩民勞傳云大也駿者玉篇云馬
之美稱也美大義近下文云云駿長也長大義亦近通作峻
詩駿命不易駿極于天禮記中庸大學及孔子閒居並引作
峻又通作浚書夙夜浚明有家釋文引馬融注浚大也詩噫
嘻釋文浚本亦作駿又通作俊夏小正云時有俊風初俊羔
傳並云俊者大也說文云俊才過干人也然則人之俊者爲
大馬之駿者亦爲大山之峻者亦爲大水之浚者亦爲大字
雖異而音義同矣京者丘之大也與墳同意釋丘云絕高爲
之京高亦大也故公羊桓九年傳云京者何大也京景聲義
同故白虎通云景者大也經典景俱訓大而亦爲明景从日

故訓明从京聲故又訓大矣碩者說文云頭大也與碩同意
小爾雅云碩遠也遠亦大也通作石漢書律厯志云石者大
也匈奴傳云石畫之臣甚衆文選爲曹公作書與孫權云明
棄碩交李善注碩與石古字通濯者方言云大也詩王公伊
濯濯征徐國毛傳並云濯大也王公伊濯釋文引韓詩云濯
美也美亦大也說文美从大與善同意故詩桑柔箋云善猶
大也善訓大知美亦訓大矣訃者詩中訃字毛傳並訓爲大
通作芋方言訃芋並云大也郭注芋猶訃也又云訃亦作芋
故詩云君子攸芋毛傳芋大也又通作吁爾雅釋文訃本又作吁是
訃韓詩作吁斯于釋文芋或作吁爾雅釋文訃本又作吁是
皆以聲爲義也凡从于之字多訓大于亦訓大故方言云于
大也檀弓云于則于說者亦以爲廣大是矣字者亦从于與
訃同說文云宇屋邊也蓋屋檐四垂爲屋之四邊天形象屋
四垂故曰天宇亦曰大宇逸周書寶典篇云七寬弘是謂寬
宇荀子非十二子篇云喬宇嵬瑣楊倞注宇大也莊子齊物
論篇釋文引尸子云天地四方曰宇然則宇之爲大可知矣
穹者與宇同意故穹隆穹崇穹蒼其義皆謂天也漢書司馬
相如傳云觸穹石張揖注穹石大石也通作空詩在彼空谷
毛傳空大也文選注引韓詩作在彼穹谷薛君曰穹谷深谷
也然則穹蓋深之大矣王者詩有王有林毛傳王大也通作
任仲氏任只傳亦云任大也史記律書云壬之爲言任也是
任王聲義同說文云王象人褻妊之形故訓爲大矣路者詩

吊夷載路厥聲載路傳並云路大也經典凡言路寢路車路
馬義皆爲大路本道路可以通達故謂之大或借爲輅玉篇
云輅大車荀子哀公問篇注引舍人云輅車之大也後漢書
張湛傳注引曲禮式路馬作軼輅馬云輅大也是輅路通矣
淫者浸淫又久而也浸久有過度之意故訓爲過過有參泰
之意故又爲大詩既有淫威毛傳淫大也文選七發云血脉
淫濯李善注淫濯謂過度而且大也然則淫濯俱訓大本於
爾雅也甫者男子之美稱美大義近故又爲大詩之甫田甫
草及魴鱖甫甫毛傳並云大也說文云誦大也讀若逋詩東
有甫草文選東都賦注引韓詩作東有圃草薛君曰圃博也
有博大茂草也後漢書班彪傳注引薛君傳作甫博也博與
圃誦俱从甫聲故義皆爲大而其字亦通矣廢者尫之假音
也說文云尫大也玉篇作𡗗又作𡗗同通作佛詩云佛時仔
肩毛傳佛大也孔穎達不知假借之義故云佛之爲大其義
未聞又通作廢郭引詩廢爲殘賊釋文云廢大也此王肅義
列子楊朱篇云廢虐之主張湛注廢大也逸周書官人篇云
華廢而誣是亦以廢爲大也壯者與契同而聲近將其義亦
相通借禮記射義云幼壯孝弟鄭注壯或爲將詩鮮我方將
毛傳將壯也是二字義同字通廣雅云將美也又云將長也
長美與大義亦近也冢者與墳義同與京義亦近說文云冢
高墳也方言云冢秦晉之間謂之墳書正義引舍人曰冢封
之大也蓋冢本封土爲名而凡大亦皆稱冢書之友邦冢君

豕亦大也然則大君謂之豕君大宰謂之豕宰大子謂之豕子大祀謂之豕祀不但詩之豕土獨擅豕名矣簡者踈節闊日之意故亦爲大論語可也簡孔安國注以簡爲大也淮南說山篇云周之簡圭生於垢石高誘注簡圭大圭也通作間尚書大傳云間尾倍其身鄭注間大也又通作閑文選魏都賦注引辭君韓詩章句曰閑大也謂閑然大也又通作簡詩簡兮釋文云簡或作簡是皆以聲爲義也劉者釋文引說文云艸大也今說文本劉作莪蓋形近誤衍莪字而於劉下又妄加艸木到三字竝誤矣玉篇劉下引韓詩作劉彼甫田詩釋文引作劉从竹亦非矣廣韵四覺蹶紐下引說文劉从艸與爾雅釋文合今據以訂正焉通作倬倬詩倬彼甫田韓詩作劉云劉卓也卓與倬同毛詩作倬說文云倬箸大也引詩倬彼雲漢毛傳亦云倬大也是倬劉音義同倬者說文及詩卷阿傳竝云倬大也通作反詩威儀反反釋文引韓詩作倬倬云善貌善與美同意美大義近倬之爲言版也與業同意故釋名云板倬也倬倬平廣也廣大義又近是韓詩之威儀倬倬本兼善大二義故玉篇云倬大也善也倬者古本作邛史記司馬相如傳云爰周邛隆索隱引樊光云邛可見之大也是樊本作邛通作倬玉篇云倬之日切大也聲近戠說文云戠大也讀若詩戠戠大猷玉篇戠難慄切與倬音同釋文倬本又作至蓋郭本卽作至故云至極亦爲大也至者極也極者中也屋之中極至爲高大故云至極亦大矣業者說文云

大版也詩毛傳同俱本釋器為說也四牡業業毛云業業然壯也又云業業言高大也高壯亦皆為大矣蕭者說文云廣多也廣多亦皆為大故詩緇衣傳蕭大也通作席漢書賈誼傳云非有仄室之執以豫席之也應劭注席大也郭引尸子曰此皆大有十餘名而同一實邢疏引尸子廣澤篇云天帝后皇辟公弘廓宏溥介純夏撫豕眊眊皆大也十有餘名而實一也今按大字之訓凡三十有九名尸子所稱才止十一又天帝后皇辟公亦俱訓大與今本異證知爾雅諸文後人多有增益及竄改者古書茫昧千載無聲編簡叢殘遺文散落夫孰從而辨之

撫厖有也

二者又為有也詩曰遂撫大東

撫厖既訓大又訓有者有大義近故復為有易雜卦云大有眾也有與大皆豐厚之意故其義相成矣撫者覆也覆者撫而有之也通作撫廣雅云撫有也禮記文王世子云君王其終撫諸鄭注撫猶有也詩則無撫仕毛傳撫厚也撫撫聲義近詩遂荒大東郭引作遂撫大東撫荒聲轉也厖者幪也幪亦覆而有之也玉篇云厖有也厚也詩為下國駿厖毛傳厖厚也正義引釋詁文是厚有其義近厖通作蒙荀子榮辱篇引詩為下國駿蒙楊倞注蒙讀為厖厚也是其字通之證

迄臻極到赴來弔艤格戾懷摧詹至也

齊楚之會郊曰懷宋曰居詩曰先祖于摧又曰

六日不詹詹摧
皆楚語方言云

說文云至鳥飛从高下至地也从一一猶地也文選長笛賦
注引字林曰至到也禮記注至來也儀禮及國語注並云至
極也互相訓也至通作砥聘禮記注今文至爲砥詩柏舟傳之至
致本作至又通作砥聘禮記注今文至爲砥詩柏舟傳之至
也泮水傳止至也止之與至並聲相轉也迄者說之假音也
說文云迄止也止亦至也通作迄書聲教說于四海漢書藝
文志說作迄詩以迄于今迄用有成迄用康年及楚辭天問
云吳獲迄古其義皆爲至也又通作迄詩迄可小康漢書元
帝紀作迄可小康臻者義詳下文薦摯臻也極者玉篇云棟
也中也又至也盡也遠也高也按極字凡有數義皆緣棟而
生棟居屋之中至爲高絕故爾雅訓至極又竟也窮也終也
終窮竟三義又緣至而生也魯語云齊朝駕則夕極於魯國
韋昭注極至也文選東京賦云是廓是極辭綜注極致也致
亦至也漢書成帝紀注極止也詩鴇羽箋極已也已止亦俱
爲至矣赴者說文云趨也儀禮注云赴走告也走趨相告義
皆爲至通作訃聘禮既夕記注並云今文赴作訃聲又與傳
近詩亦傳于天鄭箋傳至也卷阿箋傳猶戾也戾亦至矣來
者釋名云來哀也使來入己哀之故其言之低頭以招之也
詩采芣傳來至也呂覽不侵篇注來猶致也通作戾公羊隱
五年傳登來之禮記大學篇注引作登戾之戾來聲同故詩

魯侯戾止毛傳戾來也來亦爲戾戾亦爲來二字古音同之證也下文又云戾止也止亦至矣弔者遇之假音也說文云弔至也通作弔詩神之弔矣不弔昊天不弔不祥傳箋並云弔至也書云弔由靈逸周書祭公篇云予維敬省不弔其義皆爲至也詩不弔昊天書無敢不弔鄭箋及注並云至猶善也考工記弓人云覆之而角至鄭注以至爲善是至有善義故弔兼善訓矣艘者說文云船著不行也方言云艘至也史記司馬相如傳云蹋以艘路今徐廣注本爾雅艘至也漢書張揖注本說文艘著也著與至義亦近郭本孫炎以艘爲屈注竟作屈屈字誤也郭注據方言宋曰艘今誤作屈證以釋文艘郭音屈孫云古屈字可知孫郭本並非改艘爲屈矣釋言云屈極也極至義同張參五經文字以爲艘爾雅或作屈蓋自唐本已誤矣格者假之假音也說文云假至也通作格方言云格至也郭注格古格字爾雅釋文亦云格字或作格又通作假說文引虞書曰假于上下今書作格于上下凡書之來格格玉格人格于皇天之格史記漢書俱作假儀禮又通作嘏士冠禮注今文格爲嘏又通作恪逸周書小開武篇云非時罔有恪言恪卽古格字格既訓至釋言又云格來也小爾雅又云格止也止來亦至矣懷者下文云懷止也釋言云懷來也來止義俱爲至釋名云懷回也本有去意回來就己也亦言歸也來歸已也歸回義亦爲至矣擢者詩先祖于擢文選東京賦云五精帥而來擢毛傳及辭綜注並云擢至

也詹者方言云至也詩六日不詹魯邦所詹毛俱訓至文選思予賦云黃靈詹而訪命今舊注詹至也

如適之嫁徂逝往也

方言云自家而出謂之嫁猶女出謂嫁

釋名云往睢也歸往於彼也故其言之叩頭以指遠也說文云徂之也互相訓也通作廷說文云廷往也按古文徂作廷此廷卽廷字之省故左氏襄廿八年傳云君使子展廷勞於東門之外漢書五行志廷作往是矣如者小爾雅云如適也亦互相訓也春秋經凡書如晉如齊如盟如會之類皆以如爲往也通作于詩言于歸于仕于狩于邁之類皆以爲往也適者之也之者適也亦互相訓其義又皆爲往也嫁者說文去女適人也儀禮喪服注云凡女行於大夫以上曰嫁行於士庶人曰適人按此亦對文耳若散文則嫁亦爲適適亦爲嫁嫁適俱訓爲往故方言云嫁往也列子天瑞篇云子列子居鄭圃將嫁於衛趙策云韓之所以內趙者欲嫁其禍也是皆以嫁爲往也徂者說文云退往也或作徂方言云徂往也通作且詩士曰既且釋文云且音徂往也又同輿說文云輿且往也玉篇作庭同是庭且俱徂之假音矣逝者之也去也通作遯說文云遯去也夏小正云遯鴻鴈傳云遯往也易大漂其高遯今索隱曰遯音逝逝漢書賈誼傳遯正作逝是逝遯通